

Ino Turakki Pablo Ki Filemon

Ino Mapeafu Sitawa Turak

I Filemon, tata a ba'nang sey Colosas a nangurug ki Afu Jesus. Agyanino aripanna a minggan si Onesimo a nabbukal, e inang sey Roma a nabalurani Pablo. Sin nagyani Onesimo sinay, nangurug gafu sino nanulduwani Pablo sikwana, e nabbali si Kristiyano. Anggammaddi Pablo a makiigyani Onesimo sikwana, se dokallino duffunna sikwana, udde gafu se ammena ammu nu anggammami Filemon, dinandamma si pulinna sino amuna. Antuweno netura'nga yawa turak ta arangnganna si pakomani Filemoni Onesimo. Arangnganna kappay si amme nad ibilangi Filemoni Onesimo si aripampelang, nu ammena lud ibilang si kola'nga gafu sino nittatanda ki Afu Jesus.

Ino Bagga'na Yaw

Ino gafuneno turak 1-3
Ino anggurug annino aggangammami Filemon 4-7
Ino arangnganni Pablo ki Filemon 8-22
Ino ambu'nenno turak 23-25

Ino Gafuneno Turak

¹ Ikkanaki Pablo a nabalud gafu sino nasserbiyangku ki Kristo Jesus, e ayaw sitawi Timoteo a kolattam. Antuyawino tura'mi sikwam Filemon a ididdukammi a katarabafuwammi. ² Iyawa tura'mi, umang kappay ki Apia a kolattam anni Arkipo^a a bulummiya sindaluwi Kristo, annino amminira a nanguruwa makkakarampat sitan baleyuwa maddayaw ki Dios. ³ Allakkandakayu naddi Dios a Amatam anni Afu Jesu Kristo e passiyankandeno nakandaw.

^a 1:2 I Apia, atawa i Filemon, e i Arkipo, kunnino korwanira si pangafuwano manguruwira a makkakarampat sino balera. Ino korwanira kappay, kunda si abbinda Filemon anni Apia.

Ino Angngurug Annino Agganggammi Filemon

⁴Kadda ikararaddaka, Filemon, mappasalamatak ki Dios ⁵gafu se dinidingngagguweno angngurungngu ki Afu Jesus annino agganggammu sino ammina tolayira i Dios. ⁶Ikararaggu takesi gafu sino pittatantam sino angnguruddam, madadagganan naddino akkaammum mapeafu sino nalawara iya'da i Dios sikwatam gafu sino nesapatantam ki Kristo. ⁷Kolakku, maangammakungke anna nantatuyaggino nakangku gafu sino agganggammu sino tolayira i Dios, se nepattuyangnguweno nakanda.

Ino Arangganni Pablo Ki Filemon

⁸Gafu se kunnenoy ino aggangwam, aneno sapitangku sikwam. Massiki aneno kalintiyanguwa neya'da i Kristo a massapit sino nalawara akwannu, ammek akwan, ⁹nu ammek lud makiggimallak sikwam gafu so agganggantam. Antuweno akwangku, massiki ikkanaki Pablo a lakaya^b nabalud gafu sino nasserbiyangku ki Kristo Jesus. ¹⁰E ino aranggangku sikwam, allakkannu abbuweno abbingku si angnguruwa i Onesimo. Ibilangku si abbingku se kinurunggeno netulduk mapeafu ki Kristo sito nabalurangku. ¹¹Massiki nu awana neduffunna sikwam si'in, sitoaya, odduweno meduffunna sikwata a adwa.^c

¹²Pulingkuwi Onesimo sikwam, e peyangkalingkuweno agganggangku sikwana. ¹³Anggangku si magyangkepenad sitaw takesi kunnangke waraka sitawa manuffun sikwak sito nabalurangku gafu so nanulduwangku sino nalawara damag. ¹⁴Udde ammek anggam si magyan sitaw nu ammem annutan, se ammetaka anggamma patutana mangwa si nalawad, nu ammena lud maggabwat sino nakammungkepay.

¹⁵Ino nakuy inanawani Onesimo sikwam si bisangnga aw, takesi nanu muli kappay, mesapat sikwam si makkikiyad. ¹⁶Sitawin, bakkannimpelanga aripan, nu ammena lud kolattama mangurug ki Kristo. Dokallingkeno aggiddukku sikwana, udde ammenangke kun sikwam, se nabbaliyen si kola'ngu ki Kristo e odduwenneno iduffunna sikwam.

¹⁷Kunnantu, nu gakkuruwa ibilangngak si bulunnu, pagamwangannu naddi Onesimo sino puliyanna sikwam a kunna kappayino akwannu sikwak. ¹⁸Nu wara liwa'na sikwam onnu wara gatuna sikwam, ikkana'ngeno makaammu. ¹⁹Ikkanakungkepayino manurak sitaw:

^b 1:9 Ino neturak sino korwana manuskritu sino dami'na Griego: ...ikkanaki Pablo a pannakabaggiyi Kristo... Sino dami'na Griego, tata ke a letreno kelasinanneno sapi'na lakay anna sapi'na pannakabaggi. ^c 1:11 Ino anggamma sapitannino angani Onesimo, aneno duffunna.

Ikkanaki Pablo a mappaga sino gatu'na sikwam. Udde amme'ngad ipadandam si gatu'nu sikwakino biyangngu si makkikiyad. ²⁰Si kunna, kolak, gafu sino angngurungngu ki Afu Jesus, allakkannak abbu ta akwannu inaya inarangu sikwam. Pallampawannuweno nakangu, se makkolaketa ki Kristo. ²¹Manurakkak sikwam se natalanggaddak si akwannuweno inarangu, e odduweno akwannu amma sino sinapikku.

²²Ay, on mat, ana kappay sapitangu sikwam. Midadangka abbu si pagyanangu sitan baleyu, se innanamanguwa gafu sino kararaddaw, makalawanak sito abbaluran ta muliyak sikwayu.

Ino Ambu'nenno Turak

²³Manantokayu kunni Epafra a bulungkuwa nabalud sitaw gafu sino nasserbiyanna ki Kristo Jesus. ²⁴Manantokayu kanu pay a kunda Marcos, Aristarco, Demas, anni Lucas, ireno katarabafuwangu.

²⁵Allakkandakayu nad ammini Afu Jesu Kristo.